

■ SOCIETÀ FILOLOGICHE

Assemblee anuâl dai socis a Palaç Mantica

Domenie prin di Març, a lis 10 a buinore, a palaç Mantica a Udin si da dongje la assemblee dai socis de Societât filologjiche furlane, par fâ il pont sul belanç finanziari, su lis ativitâts fatis e su chês in program. Tra i events 2014 si ricuarde in particolar, in Jugn, la prime edizion de Setemane de culture furlane, che e à puartât la Filologjiche in plui di 25 localitâts dal Friûl storic e fûr regjon e che si tornarà a fâ chest an, dai 7 ai 17 di Mai.

Tal 2015 e sarà la volte di Cjarlins pe Fraie e di Sopula in Setembar pal Congrès. A son ladis indevant lis ativitâts di formazion, cun buine partecipazion ai cors pratics e ai cors pai insegnants, e de biblioteche sociâl. Tra i progjets o nomenin "Conosciamo la Grande Guerra in Friuli - 1914", finanziât de Regjon: pene sierade la schirie dai seminaris di inzornament e in curt a tacaran i laboratoris intes scuclis. In fin, il sît internet www.filologicafriulana.it al à une muse gnove.

SCOLTADIS DI DRIUS

Cartel induvinât

Tal gno país le stradele che mene tal simitieri e à el cartel cun scrit "senso unico". El Cumun le à propit induvinade!



La presentazion dal projet a Udin



Carton animât di gale

Presentade in Regjon, li de sede di vie Sabbadini, la gnove produzion dal Centro teatro animazione di Gurize, finanziade de Arlef. Fuarcis teatrâls, musicâls e grafichis a pro dal furlan.

» DI CHRISTIAN ROMANINI

Loredana Panariti no à vût dubis: "Une produzion di cualitât che si presente tant che un bon imprest didatic par fâ imparâ la lenghe furlane ai fruts".

Cussì la assessore regjonâl ae Istruzion e à saludât la Âf blu, la protagoniste dal 'numar 0' dal gnûf carton animât prodot dal Centro Teatro Animazione di Gurize (www.ctagorizia.it) e finanziât de Agenzie regjonâl pe lenghe furlane che, come che al à dit il so president **Lorenzo Fabbro**, "si impegne e e sosten a fuart lis iniziativis di promozion linguistiches tra i plui piçui".

"Pal nestrî Centri, chest al è un projet sperimentâl cuntune caraterizazion multimediâl fuarte e cuntune relazion tra lengaç teatrâl e lengaç di animazion une vore interessante - al spieghe **Roberto Piaggio**, diretôr artistic dal CTA -. Cun 'Âf Blu' nus à parût di vê cjatade une idee di cualitât, il sogjet just di proponi. Cumò o sperin di

podêlu fâ cressi e completâlu".

Ideât e realizât di **Serena Di Blasio**, animât di **Giorgio Cantoni** cu la colaborazion pai tescj par furlan di **Michele Polo** e pes vòs di **Nicoletta Oscuro**, la Âf blu e je disegnade di **Giulia Spanghero**, laureade in Conservazion dai bens culturâi a Udin cuntune tesi in sociologjie de art intitulade "Fumetto post-moderno italiano e società: origini del medium, linguaggio grafico e contaminazioni con l'arte contemporanea".

COLABORAZIONS DI NIVEL

Dopo di vê colaborât cun Disney Italia e Disney U.K. tant che sogjetiste e senegjatore, cu la Trudi SpA tant che designer e cun diversis cjasis editoris tant che grafiche, la Spanghero cumò e esercite la profession libare tant che grafic designer e ilustradore.

Tes aventuris di cheste simpatiche avute dute blu, a àn une fun-

zion strategjiche ancje lis musicis originâls di **Matteo Sgobino**, cun **Didier Ortolani** e **Alessandro Turchet**. Di fat, pûr someant une vore semplicis, a son invezit une vore studiadis e refinadis: il risultât al è che a jentrin subit tal cjâf dai fruts che lis sintin e lis ripetin daurman. I struments musicâi a diventin te storie un zûc par creâ colôrs gnûfs, cjantis e suns improvisâts che a caraterizin i protagoniscj de storie: il clarinet, la ghitare e il cuintribàs a diventin cussì lis besteutis stessis cui lôr simpatics moviments e lis lôr grandis emozions. Lis cjançons e i suns diferents duncje a dan forme a chel mont di aventuris dulà che si ambiente la storie de Âf blu.

Intant che si spiete di viodi la serie complete, la pontade presentade in anteprime e sarà a disposizion sul sît dal Cta di Gurize www.youtube.com/user/CTAgorizia.



ilfriuli@ilfriuli.it

SMS: 393 00 90700
diretta@radiofantasy.it
TEL. +39 0431 30022

www.radiofantasy.it

UDINE VENETO ORIENTALE	FM 90.700	GORIZIA	FM 89.100	PAULARO	FM 107.700
PORDENONE	FM 95.800	TRIESTE	FM 89.100	TOLMEZZO	FM 101.600